


Nejednakost između aritmetičke i geometrijske sredine ipak nije svemoćna

Šefket Arslanagić, Sarajevo, Bosna i Hercegovina



Nejednakosti između brojnih sredina veoma su važne u matematici. Tu se naročito ističe nejednakost između aritmetičke i geometrijske sredine n pozitivnih brojeva koja glasi:

$$\frac{a_1 + a_2 + \dots + a_n}{n} \geq \sqrt[n]{a_1 \cdot a_2 \cdot \dots \cdot a_n};$$

$$(a_i > 0, i = 1, \dots, n) \quad (1)$$

gdje znak jednakosti vrijedi ako i samo ako je $a_1 = a_2 = \dots = a_n$.

Mnoge algebarske i geometrijske nejednakosti efikasno se dokazuju pomoću nejednakosti (1). No sada ćemo dati jedan primjer nejednakosti koju ne možemo dokazati direktno pomoću (1), a možemo veoma elegantno na više drugih načina.

Riječ je o nejednakosti

$$a^3b + b^3c + c^3a \geq abc(a + b + c), \quad (2)$$

gdje su $a, b, c > 0$.

Dokaz. Očigledno, nakon dijeljenja dane nejednakosti sa $abc > 0$, dobivamo ekvivalentnu nejedna-

kost:

$$\frac{a^2}{c} + \frac{b^2}{a} + \frac{c^2}{b} \geq a + b + c. \quad (3)$$

Pokušajmo sada dokazati nejednakost (3).

Na osnovi nejednakosti (1), između aritmetičke i geometrijske sredine za $n = 3$, dobivamo:

$$\frac{1}{3} \left(\frac{a^2}{c} + \frac{b^2}{a} + \frac{c^2}{b} \right) \geq \sqrt[3]{\frac{a^2}{c} \cdot \frac{b^2}{a} \cdot \frac{c^2}{b}},$$

odnosno

$$\frac{a^2}{c} + \frac{b^2}{a} + \frac{c^2}{b} \geq 3 \cdot \sqrt[3]{abc}.$$

Ako vrijedi sada nejednakost

$$3 \cdot \sqrt[3]{abc} \geq a + b + c, \quad (4)$$

vrijedila bi i nejednakost (3), tj. dana nejednakost (2) bila bi dokazana.

Nažalost, iz nejednakosti (4) slijedi:

$$\frac{a + b + c}{3} \leq \sqrt[3]{abc},$$

a ova nejednakost nije točna jer na osnovi (1) za $n = 3$ vrijedi:

$$\frac{a+b+c}{3} \geq \sqrt[3]{abc}.$$

Eto, nejednakost (1) ne daje dokaz nejednakosti (3), odnosno dane nejednakosti (2).

Sada ćemo dati jedan veoma elegantan dokaz nejednakosti (3). Imamo

$$\begin{aligned} \frac{a^2}{c} + \frac{b^2}{a} + \frac{c^2}{b} &= \\ &= \frac{a^2 + c^2 - c^2}{c} + \frac{b^2 + a^2 - a^2}{a} + \frac{c^2 + b^2 - b^2}{b} \\ &= \frac{a^2 + c^2}{c} + \frac{b^2 + a^2}{a} + \frac{c^2 + b^2}{b} - (a + b + c) \\ &\geq \frac{2ac}{c} + \frac{2ab}{a} + \frac{2bc}{b} - (a + b + c) \\ &= 2a + 2b + 2c - (a + b + c) \\ &= a + b + c, \end{aligned}$$

tj. nejednakost (3) je dokazana.

Ovdje smo se koristili nejednakošću

$$\begin{aligned} x^2 + y^2 &\geq 2xy; \quad (x, y \in \mathbf{R}) \\ (\Leftrightarrow (x - y)^2 &\geq 0). \end{aligned}$$

Ustvari, možemo reći da je to ipak nejednakost između aritmetičke i geometrijske sredine (2) za $n = 2$ i $x, y > 0$. Dakle, i nejednakost (2) je točna, gdje vrijedi jednakost ako i samo ako je $a = b = c$.

Sada ćemo dati još jedan dokaz nejednakosti (2) primjenom Cauchy-Bunyakovsky-Schwarzove nejednakosti koja glasi:

$$\begin{aligned} (a_1b_1 + a_2b_2 + \dots + a_nb_n)^2 \\ \leq (a_1^2 + a_2^2 + \dots + a_n^2)(b_1^2 + b_2^2 + \dots + b_n^2), \end{aligned} \quad (5)$$

gdje $a_i, b_i \in \mathbf{R}$, $i = 1, \dots, n$ i vrijedi jednakost ako i samo ako je $\frac{a_1}{b_1} = \frac{a_2}{b_2} = \dots = \frac{a_n}{b_n}$.

Mi ćemo se koristiti nejednakošću (5) za $n = 3$, tj.

$$\begin{aligned} (a_1b_1 + a_2b_2 + a_3b_3)^2 \\ \leq (a_1^2 + a_2^2 + a_3^2)(b_1^2 + b_2^2 + b_3^2). \end{aligned} \quad (6)$$

Stavljajući u (6) da je $a_1 = \sqrt{c}$, $a_2 = \sqrt{a}$, $a_3 = \sqrt{b}$, $b_1 = \sqrt{a^3b}$, $b_2 = \sqrt{b^3c}$, $b_3 = \sqrt{c^3a}$, imamo:

$$\begin{aligned} (\sqrt{a^3bc} + \sqrt{ab^3c} + \sqrt{abc^3})^2 \\ \leq (a + b + c)(a^3b + b^3c + c^3a), \end{aligned}$$

odnosno

$$(\sqrt{abc})^2(a+b+c)^2 \leq (a+b+c)(a^3b+b^3c+c^3a),$$

tj.

$$a^3b + b^3c + c^3a \geq abc(a + b + c),$$

a ovo je nejednakost (2) koju je trebalo dokazati.

Na kraju ćemo dati još jedan dokaz nejednakosti (3), odnosno (1) uz pomoć nejednakosti (vidi [2], str. 53–60) koja glasi:

$$\frac{a_1^2}{x_1} + \frac{a_2^2}{x_2} + \dots + \frac{a_n^2}{x_n} \geq \frac{(a_1 + a_2 + \dots + a_n)^2}{x_1 + x_2 + \dots + x_n}, \quad (7)$$

gdje su $x_i > 0$, $a_i \in \mathbf{R}$, $i = 1, 2, \dots, n$.

Ustvari, koristit ćemo se nejednakošću (7) za $n = 3$:

$$\frac{a_1^2}{x_1} + \frac{a_2^2}{x_2} + \frac{a_3^2}{x_3} \geq \frac{(a_1 + a_2 + a_3)^2}{x_1 + x_2 + x_3}. \quad (8)$$

Stavljajući u (8) da je $a_1 = a$, $a_2 = b$, $a_3 = c$, $x_1 = c$, $x_2 = a$, $x_3 = b$, dobivamo:

$$\frac{a^2}{c} + \frac{b^2}{a} + \frac{c^2}{b} \geq \frac{(a + b + c)^2}{c + a + b},$$

tj.

$$\frac{a^2}{c} + \frac{b^2}{a} + \frac{c^2}{b} \geq a + b + c,$$

a ovo je nejednakost (3).

LITERATURA

- 1/ Š. Arslanagić, *Matematika za nadarene*, Bosanska riječ, Sarajevo, 2004.
- 2/ Š. Arslanagić, *Matematička čitanka*, Grafičar promet d.o.o., Sarajevo, 2008.